

安陽縣志

六

安陽縣志卷之九

邑令襄平馬國楨纂修

藝文志

下

○碑銘

宋故大中大夫行右諫議大夫上柱國南陽縣

開國男食邑三百戶賜紫金魚袋贈開府儀

同三司太師中書令兼尚書令魏國公韓公

神道碑銘并敘

富

弼

鄭公

丞相衛國公以書來告曰我先人沒於大中祥符四年春三月之甲申葬於慶曆五年春二月之己酉雖論行有狀誌壙有銘載於史有傳施之幽顯不爲無述然墓在吾里相州安陽縣之新安村有窆棺之碑存諸隧公雅與我游又嘗陪議軍國於二府知吾家爲詳宜爲我列人事實刻於其上以表於道燦然使後世觀之者曰此有宋賢臣之墓可信不惑不待鉤考而後見則吾志畢矣余曰諾按春秋晉侯有子

食韓原其後遂以韓命氏六卿裂晉自王又有以韓國爲氏者子孫散適諸郡國其在昌黎者最爲著姓公卽昌黎之裔也達者歷世不絕遠祖徙居涿州之博野四代祖曰又賓事唐僖宗爲鎮冀涿趙等州節度判官檢校太子左庶子兼御史中丞時巢寇亂中原其帥王景崇檄諸鎮兵大破之謀皆出於庶子庶子生二子其季曰昌辭於公爲曾王父終於真定府鼓城令鼓城生璆爲王父少自力學工爲歌詩與晉

人李崧徐臺符淡相善名重一時任廣晉府永濟令
避亂又徙居趙郡之贊皇臺符爲作詩哀其不達而
終其詩甚悲崧乃以其弟之女妻其子構卽公之考
妣也考始居於相以文章稱尤妙書奏諸侯府爭辟
之能致之者卽一府遂治嘗宰貝州之清河始至與
民約曰屈法擾人等事吾斷腕不爲惟惠利者爲若
力之民於是大悅然亦畏伏絲毫不敢犯歷仕周晉
二代以世亂亦不得進入宋藝祖平南海徧選守臣

乃命知康州未幾以太子中允卒於官公漸顯累贈
工部尙書有子四人公於次爲第三諱國華字光弼
幼而警絕鄉舉進士太宗初一上中興國二年甲科
授太理評事通判瀘州代還遷右贊善大夫會詔與
相帥擇賢佐敗彰德軍節度判官凡從官者率以鄉
里爲難至則斂鋒鏑一煦以恩公時尙少處之氣益
勁不爲少損有民李氏者怙富殺人厚以賄州之上
下爲汨其情將不寘於死公持之盡抉其姦隱李卒

棄市由是諸豪憚之疊足不敢動公每出按轡儼然
未嘗妄視里人每置酒賭曰有見其左右顧者飲之
至罷去竟不得飲時國用方窘半倚關賦乃升秘書
省著作郎監上蔡稅以監察御史召彈擊有稜角巖
然望高於臺閣屬天子議復燕薊揣廷臣曰安得勇
而善辭令者爲我諭高麗出兵西攻以分其力則吾
事可不勞而集旣曰非韓某不可卽假以太常少卿
爲使公馳舸至其國其王負固不卽奉詔公坐館舍

遺王書責以慢命且稱朝廷威德之盛諸僭偽悉以
擒滅遂欲北取故疆以雪晉恥而委王以方面者其
意不已重乎惟我中國是賴可以得志諸部雖暫勤
而衆實王長世之利也今若不勉天子怒一日大兵
東出先誅不用命者如決海灌爛火王其無悔王大
恐奔走率職明日遣大相韓光元輔趙抗領兵數萬
度沮江以侵契丹且令光等率諸將詣館門聽命公
待以陪臣禮爲指畫方畧銜勒而慰遣之師期未集

公又累與王書獎激礪使不得少懈復問曰深入
攻之邪姑挑戰也王報曰已深入矣公得其肝膽遂
復命天子喜拜右拾遺直史館面賜五品服章兼判
登聞院入三司爲開封推官公論開封司主出納三
部文籍置推官其名不正宜更判事之號尋詔改主
判三司開拆司遷左司諫充鹽鐵判官久之契丹大
將蕭寧遣使叩雄州約和州將劉福信之以聞天子
因思高麗功立命公走雄州按其事亦令代福作報

書索其情僞寧之意欲我先發公固願息兵以養民
然念國體不可屈書十餘反終不許復意其譎而有
謀乃謝使者急令備邊還奏天子又大喜益愛其才
故事凡曲燕五品以下官非隸館閣者不預時燕侍
臣於苑中公以在鹽鐵例罷史局不得入侍天子特
命直昭文館三司判官兼館職自公始既又歷判鹽
鐵度支戶部三勾院改左計司判官主計者嫌其守
正不肯下密讒於帝帝雅信公卽日詔總判三司賜

三品服章仍令宰相召於政事堂諭旨讒者太祖公
圖報益自奮條三司不便事二十七上之官民偕利
後無以易者遂著爲法俄出爲京東轉運副使卽拜
峽路轉運使峽爲險遠一路官俸薄不可責以廉公
奏益之至今峽中官德公不已真宗卽位入判大理
寺自始登尙書秩至是凡五遷爲職方郎中出知河
陽徙潞州會契丹由梁門入犯河朔分兵畧太行其
鋒甚銳潞人恐公以精騎屯吳谷扼其奔衝敵遂不

敢犯其境又率本道糧以餉朔軍王師大濟帝嘉之
褒以璽書景德初契丹再至澶淵驟請修好朝廷以
其多變詐使絕域者難其人人亦憚其往故首命公
假秘書監爲國信使江南饑又遣巡撫專一道之政
還朝權開封府判官出知曹州拜太常少卿徙泉州
天子封太山擢爲諫議大夫召歸道病卒於建陽驛
泉人聞之傾一州來會哭久不忍去朝廷舉卹典賜
一子官所以慰其旅覓也公儀相魁碩有偉量與人

接坦然必盡其誠不露形跡亦不設機鍵尤篤於孝
友常恨祿不逮親居多感涕凡俸賜悉分惠宗黨不
問疎密姊數人孀且老皆迎歸奉之以終其身又爲
外姻之貧者畢嫁娶復與營其生事教子舍悉用經
術而濟之以嚴法得任子不與奏蓋欲使其自致也
故諸子多能踐其世科公沒後布衣者尙三人焉噫
公年十九時已入官壽雖止五十五而其間從政者
幾四十年可謂久矣事兩朝不懈夙夜國家每有急

難處必首被選委又在計庭更八任不得解迹其從來不爲不遇中外望歸謂必大所受天子亦屢欲用之而公素方整守道權倖者多不說故每爲其所間而止公惟所任莫不竭其力不以抑壓自憊而遂浮沉於時向若得所用如人之所望者經綸設施布宣光昭其爲功德非古賢孰與校之哉娶羅氏諫議大夫延吉之女鄴王紹威之孫封宜城縣君六男球湖州德清尉瑄將作監主簿琚司封員外郎兩浙轉運

使琬河陽司法叅軍璩秘書著作佐郎或自科舉或由蔭授方以才名竝進而不幸繼亡琦相仁宗皇帝被遺制立天子爲門下侍郎兼兵部尙書同中書門下平章事昭文館大學士衛國公望臨天下勲冠列辟以公積德儲慶所宜身享厚報然恨早世不克待其發而發於丞相丞相以似以繼傳之者又可涯邪一女歸於衛尉卿高志寧丞相貴累贈公與祖尙書曾祖永濟三代竝太師中書令兼尙書令又啓魏燕

冀三國皆追封爲公妣羅氏祖妣李氏曾祖妣史氏
亦以魏燕齊三國追封太夫人銘曰士孰不官公官
獨難使臨東島跨海渺漫指麾出師勢分敵患王始
倔強恃遠且艱視詔抹刺不奉以虔公怒移書以訶
以譎闕以禍福同異之觀王雖島酋聞義惕然發兵
餽糧革頑易慳對盧壽薩伏命館門能俾遠敵舉國
奔職不憚已勞不畏鄰隙又俾強敵斂其毒螫二邦
由公一舉斯得繼走朔陞議收戈戢坐策立判寇姦

不施不爲其欺國不挫威兩使外禦天子再怡益之
衆美大用是宜而卒不用讒人之爲復不永年道卒
遐裔與考同之勤官攸致位不都躬萃於幼嗣曰將
曰相勲德各世本支原流公得何異何以畀之天相
其類天實使然人亦靡然誌諸冥然其昭昭然

按韓公先封衛國書錦堂記石刻可攷後乃封
魏

宋神宗御製兩朝顧命定策元勲之碑

熙寧八年六月甲寅定策元勲之臣永興軍節度使